

**PEMBERITAHUAN PERTANYAAN LISAN
DEWAN NEGARA MESYUARAT PERTAMA, PENGGAL KELIMA
PARLIMEN KETIGA BELAS**

PERTANYAAN : LISAN

TARIKH : 19 April 2017

SOALAN

DATUK SERI SYED IBRAHIM BIN KADER minta MENTERI PEMBANGUNAN WANITA, KELUARGA DAN MASYARAKAT menyatakan pesalah dan pendera kanak-kanak kini dilihat mendera kanak-kanak tanpa belas kasihan dan tidak menghiraukan sistem perundangan di negara ini jika disabitkan keasalahan. Bakal majikan ini juga kebanyakannya mengambil pekerja di pusat jagaan kanak-kanak tanpa menyiasat latar belakang mereka. Apakah tindakan proaktif yang boleh dilakukan oleh Kerajaan untuk menentukan keselamatan kanak-kanak ini terjamin.

JAWAPAN

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat Malaysia (JKM) telah diberi tanggungjawab menguatkuasakan Akta Taman Asuhan Kanak-Kanak 1984, Akta Pusat Jagaan 1993, Peraturan-Peraturan Taman Asuhan Kanak-Kanak 2012 dan Peraturan-Peraturan Pusat Jagaan 1994. Prosedur operasi standard (SOP) yang digunakan oleh KPWKM untuk memastikan keselamatan kanak-kanak yang ditempatkan di pusat jagaan kanak-kanak dalam keadaan selamat adalah berdasarkan kepada Peraturan-Peraturan Taman Asuhan Kanak-Kanak 2012 khusus bagi kanak-kanak di bawah usia empat (4) tahun dan Peraturan-Peraturan Pusat Jagaan 1994 bagi mana-mana penghuni di pusat jagaan termasuklah pusat jagaan bagi kanak-kanak, tidak kira pusat jagaan yang bersifat harian ataupun berkediaman. Setiap pengusaha TASKA dan pengendali pusat jagaan hendaklah mematuhi keperluan dan kehendak yang dinyatakan di dalam peraturan yang telah ditetapkan. Tuan Yang Dipertua, Bagi memastikan tahap penyampaian perkhidmatan TASKA dan pusat jagaan termasuk pusat yang dikendalikan oleh pihak swasta berada di tahap keselamatan yang tinggi, Kementerian melalui JKJ juga telah mengambil inisiatif seperti berikut; Di antara bentuk pemantauan yang dijalankan ialah : 1) Memastikan semua TASKA memasang CCTV mengikut pekeliling Ketua Pengarah Bil 1/2015. a. Mewajibkan pemasangan CCTV akan dimasukkan dalam pindaan Peraturan Taman Asuhan Kanak-kanak (TASKA) 2012 yang sedang dibangunkan. 2) Akta Kanak-Kanak (Pindaan) 2016 turut menambahbaik maklumat dalam daftar kanak-kanak. Butiran berkaitan dengan individu yang melakukan kesalahan penderaan terhadap kanak-kanak termasuk di TASKA dan Pusat Jagaan diselaraskan bersama PDRM dan direkodkan di dalam daftar berkenaan. Isi kandungan di mana bukan hanya mengandungi butiran kes kanak-kanak yang memerlukan perlindungan sahaja tetapi turut mengandungi butiran orang yang disabitkan atas apa-apa kesalahan yang seseorang kanak-kanak adalah mangsa. 3) Kementerian telah mengadakan program advokasi seperti Program Jom Daftar bagi setiap negeri untuk memastikan lebih banyak TASKA berdaftar. Melalui pendekatan ini, ia dapat mencegah berlakunya penderaan kanak-kanak di TASKA kerana selepas pendaftaran pihak Kementerian melalui JKJ akan membuat pemantauan secara berkala bagi memastikan TASKA memberi perkhidmatan yang berkualiti. Hasil daripada program tersebut, pendaftaran TASKA telah meningkat sebanyak 41 peratus di mana pada tahun 2015 sebanyak 362 buah TASKA berdaftar manakala pada tahun 2016 sebanyak 510 TASKA berdaftar. 4) Tindakan penguatkuasaan yang boleh diambil keatas TASKA dan Pusat Jagaan yang didapati ada berlakunya kes penderaan boleh dikenakan arahan bertulis kepada pengusaha untuk mematuhi peraturan-peraturan pusat jagaan 1994 dan arahan penutupan premis tersebut atas kuasa KPKM selama tempoh 30 hari atau tempoh sebagaimana difikirkannya perlu bagi menunggu siasatan pihak polis selesai. 5) Dari Januari sehingga Disember 2016, JKJ telah mengeluarkan Arahan Bertulis kepada 42 buah TASKA dan 16 buah pusat jagaan, 9 buah TASKA dan 3 buah pusat jagaan diambil tindakan lak, 14 buah TASKA dan 4 buah pusat jagaan dikenakan tindakan kompaun, 3 buah TASKA dikenakan tindakan tutup sementara, 53 buah TASKA dan 18 buah pusat jagaan dibatalkan pendaftaran, dan 10 buah TASKA dan 9 buah pusat jagaan telah didakwa.

